



Broj: 03-03-04-4686/22
Sarajevo, 11.04.2022. godine

Na osnovu člana 200., a u vezi sa članom 122. i članom 139. Zakona o upravnom postupku ("Službene novine Federacije BiH", broj: 2/98 i 48/99), te članom 43. Zakona o udruženjima i fondacijama ("Službene novine Federacije BiH", broj 45/02), Ministarstvo pravde i uprave Kantona Sarajevo donosi

RJEŠENJE

Prestaje sa radom Vijeće mladih Kantona Sarajevo, sa sjedištem na Ilidži, ulica Banjska broj 2, upisano u Registar koji se vodi kod Ministarstva pravde i uprave Kantona Sarajevo, Rješenjem broj: 03-05-05-3746/13 od dana 05.07.2013. godine, pod registarskim brojem 1822, knjiga IV Registra udruženja.

Obrazloženje

Radi zaštite javnog interesa, Ministarstvo pravde i uprave Kantona Sarajevo, pokrenulo je po službenoj dužnosti skraćeni postupak preispitivanja zakonitosti i postojanosti Vijeća mladih Kantona Sarajevo.

Ministarstvo pravde i uprave Kantona Sarajevo je 11.10.2021. godine zaprimilo Informaciju o istupanju iz članstva i rada Vijeća mladih Kantona Sarajevo od strane Vijeća mladih Općine Novo Sarajevo i Vijeća mladih Općine Centar Sarajevo. U Informaciji se navodi da su ova dva općinska vijeća mladih informisala Vijeće mladih Kantona Sarajevo 09.08.2020. godine o prestanku obnašanja funkcija unutar Vijeća mladih Kantona Sarajevo, te da od tada ne učestvuju u radu Vijeća mladih Kantona Sarajevo. Shodno navedenom u Informaciji su na postupanje pozvali i nadležne institucije da preispitaju zakonitost i postojanost Vijeća mladih Kantona Sarajevo.

Ministarstvo pravde i uprave Kantona Sarajevo je postupajući po ovoj Informaciji, 13.10.2021. godine uputilo prema resornom ministarstvu, Ministarstvu za nauku, visoko obrazovanje i mlade Kantona Sarajevo, akt kojim je traženo da u skladu sa članom 47. Zakona o udruženjima i fondacijama ("Službene novine Federacije BiH", broj 45/02) izvrši nadzor nad zakonitošću rada Vijeća mladih Kantona Sarajevo, te da nakon izvršenog nadzora primjerak izvještaja dostavi ovom ministarstvu. Kako resorno ministarstvo nije postupilo po traženom, ovo ministarstvo je 18.11.2021. godine poslalo i urgenciju.



Umjesto izvještaja o provedenom nadzoru, resorno ministarstvo je 21.01.2022. godine ovom ministarstvu, Vijeću mladih Kantona Sarajevo, Vijeću mladih Federacije BiH dostavilo Rješenje, broj: UP1 27-04-927/22 od 20.01.2022. godine, kojim se ukida Rješenje Ministarstva za obrazovanje, nauku i mlade Kantona Sarajevo broj:11-05-05-17202-1/13 od 26.06.2013. godine, a kojim je pri upisu u Registar udruženja kod ovog ministarstva dato pravo da u svom nazivu koristi "Kanton Sarajevo", u skladu sa članom 10. Zakona o udruženjima i fondacijama.

Udruženje Vijeće mladih Općine Ilidža je prestalo sa radom Rješenjem ovog ministarstva, broj: 03-03-04-10252/21 od 12.08.2021. godine.

Udruženje Vijeće mladih općine Vogošća je prestalo sa radom Rješenjem ovog ministarstva, broj:03-03-04-4401/22. od 05.04.2022. godine.

Uvidom u Zbirku isprava Vijeća mladih Kantona Sarajevo ustanovljeno je da je Vijeće mladih Kantona Sarajevo osnovalo pet općinskih vijeća registrovanih kod ovog ministarstva i to: Udruženje "Vijeće mladih Općine Stari Grad Sarajevo", Udruženje "Vijeće mladih općine Vogošća", Udruženje "Vijeće mladih Općine Novo Sarajevo", Udruženje "Vijeće mladih Općine Novi Grad Sarajevo" i Udruženje "Vijeće mladih Općine Ilidža". Vijeće mladih Kantona Sarajevo je prilikom osnivanja dostavilo i Rješenje Ministarstva za obrazovanje, nauku i mlade Kantona Sarajevo broj:11-05-05-17202-1/13 od 26.06.2013. godine, kojim je Vijeću mladih dato pravo da u svom nazivu koristi "Kanton Sarajevo", u skladu sa članom 10. Zakona o udruženjima i fondacijama.

U Statutu Vijeća mladih Kantona Sarajevo, broj:03-05-05-3743/13 od 05.07.2013. godine, u članu 10. stav (2) navedeno je da Skupštinu Vijeća mladih čini 5 delegata iz svakog općinskog vijeća mladih koja su registrovana u Kantonu Sarajevo.

Uvidom u posljednje prijavljene promjene Vijeća mladih Kantona Sarajevo, od 24.02.2020. godine utvrđeno je da je u Odluci o imenovanju članova Upravnog odbora Vijeća mladih Kantona Sarajevo imenovano 6 članova, predstavnika općinskih Vijeća mladih. Od tog broja dva su člana predstavnici Vijeća mladih Novo Sarajevo i jedan član je predstavnik Vijeća mladih općine Ilidža.

Zakon o udruženjima i fondacijama odredbom člana 33. stav (1) propisuje da su udruženja dužna Ministarstvu pravde i uprave Kantona Sarajevo prijaviti „promjene statuta, naziva, sjedišta, ciljeva i djelatnosti, lica ovlaštenog za zastupanje i predstavljanje, članova organa upravljanja, pripajanje, razdvajanje ili transformaciju, te prestanak rada Udruženja u roku od 30 dana od dana izvršenih promjena.”

Prestankom rada Vijeća mladih Općine Ilidža, 12.08.2021. godine, i istupanjem iz članstva Vijeća mladih Kantona Sarajevo od strane Vijeća mladih Općine Novo Sarajevo, 09.08.2020. godine, o čemu je zvanično informisno ovo ministarstvo 11.10.2021. godine, nastupila je statusna promjena u organima upravljanja Vijeća i od tada je protekao zakonom propisan rok u kojem je Vijeće Mladih Kantona Sarajevo bilo dužno sazvati i održati sjednicu skupštine, te prijaviti promjene ovom Ministarstvu.

Rješenjem Ministarstva za nauku, visoko obrazovanje i mlade Kantona Sarajevo broj: UP1 27-04-927/22 od 20.01.2022. godine, kojim je ukinuto pravo Vijeću mladih da u svom nazivu koristi "Kanton Sarajevo", nastupila je i statusna promjena u nazivu udruženja.



Odredbom člana 43. stav (2) tačka 2. Zakona o udruženjima i fondacijama propisana je pretpostavka prestanka djelovanja udruženja: "ako se broj članova udruženja smanji ispod broja određenog ovim zakonom za osnivanje udruženja, a skupština udruženja u roku od tri mjeseca od dana nastupanja ove okolnosti ne donese odluku o prijemu novih članova."

Istupanjem iz članstva Vijeća mladih Općine Novo Sarajevo kao jednog od osnivača Vijeća mladih Kantona Sarajevo i prestankom rada dva općinska vijeća mladih koji su također osnivači Vijeća mladih Kantona Sarajevo smanjen je broj osnivača udruženja ispod broja određenog ovim zakonom. Na osnovu utvrđenih činjenica zaključuje se da Vijeće mladih Kantona Sarajevo nije u mogućnosti sazvati i održati skupštinu.

Na osnovu svega navedenog, a uzevši u obzir i Zaključak Vlade Kantona Sarajevo broj: 02-04-7120-35/22 od 03.03.2022. godine, u svrhu zaštite javnog interesa i utemeljeno na službenim podacima kojima raspolaže Ministarstvo pravde i uprave Kantona Sarajevo, na osnovu člana 200., a u skladu sa članom 122. i članom 139. Zakona o upravnom postupku ("Službene novine Federacije BiH", broj: 2/98 i 48/99), te člana 43. Zakona o udruženjima i fondacijama ("Službene novine Federacije BiH", broj 45/02), odlučeno je kao u dispozitivu rješenja.

Pouka o pravnom lijeku:

Ovo rješenje je konačno, te protiv njega nije dopuštena žalba, ali se može pokrenuti upravni spor, tužbom kod Kantonalnog suda u Sarajevu u roku od 30 dana od dana prijema ovog rješenja. Tužba se podnosi u dva istovjetna primjerka, uz istu se prilaže i ovo rješenje u originalu ili prepisu.



Dostaviti:

1. Vijeću mladih Kantona Sarajevo,
ul. Banjska broj 2, Sarajevo;
2. Federalnom ministarstvu pravde;
- ③ Ministarstvu za nauku, visoko obrazovanje i mlade Kantona;
4. Zbirci isprava,
5. JP NIO "Službeni list BiH".
6. Poreznoj upravi FBiH
Porezni ured Sarajevo – ul. Husrefa Redžića broj 4,
7. Arhivi.



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-083. Fax: + 387 (0) 33 562-241
Web: <http://mpu.ks.gov.ba>. E-mail: mpu@mpu.ks.gov.ba

3/3

